



Dat erste Tornreck in Olderoj

Von Peter R h i e m , Dinslaken

Denn 70er Krieg wor twee Jahr vörbej. Do kreg Lehrder Pickart ehnen gujen Dag en Brief van de Landroot. Denn luhden ungefähr so:

„Damit unser Volk auch in Zukunft sich körperlich ertüchtigt, wird von der Landesregierung Düsseldorf eingeführt: Ein Turnreck und ein Turnbaren an jeder Schule (auch Elementarschulen). Nachschrift: Wollen Sie die vorgenannten Turngeräte durch einen Handwerker aufstellen lassen. Die Rechnung ist an mich in persona zu richten, worauf die Bezahlung aus der Kreiskasse an den Hersteller der Geräte erfolgt. (gez.) Der Landrat.“

„Nou wöt doch alles geck!“ Dat wor et erste, wat Pickart seggen kos, wie hei dat läsen. „Frau, hör es tu! Eck olde Kerl, denn all voll Gech sett, ek sall de Blagen noch et Turnen lehren. Wenn ek en Trapp herop mot gohn, ös mech denn Ojem all fott. Gott näh! An son Reck wüd ek drahn hangen wie en „Keckwoos“, denn nit mehr höppen kann. Ek sall mej noch von de Blaagen ütlachen looten. Lot mej de Landroot det ers vormäken. Denn ös grad so old on stiff es ek!“ „Gott, wat en Welt vandag“, sag Pickart sin Frau mar blos on nohm de Schörz vör de Ogen, öm en Trönken aftuputzen. Pickart lag denn Brief fott, äs wenn hei nit angekommen wor, on doch mar: „Ek hol mei stiff.“ Nor vier Weeken frug me vant Landrootamp ahn, of die Reeknong bald köm van de Turngeräte?? Nou blew Pickart nex mehr över, as ahntufangen. So besprook hei sech dann met „Möllekamps Ditz“ üt Holten, on denn miek dann ok son Ongetüm van Tornreck ferdig. En ganz onmöndeg Deng wor et. Hei wor so breet, dat in ons Tittölder jeden Bestevader noch dröwer her dei loopen, wor die Kender Klemmzüg drahn maken sollden. Kott on gut, hei stohn dor massiv en de Grond. Tweemol in de Week wudden en Tornstond ahngesatt, on Pickart liet ömmer drej on drej Jonges drahnsprenge. Dat Kommando hitten: „Hee — — — rop — — —!“ on jeder versückten nou an denn Balken drahtusprenge. Hier on dor gelang et nit! Dann wor Pickart son Mensch, dann böhrde hei de Blagen drahn. Schon dat nömmes de Knöök bräken soll. Hat hei de Jonges dor hangen, es en paar Hippen op de Ledger, kom dat Kommando: „Treck — — —op!“ Drejmol trocken sech dann de Blagen hoch. Dann word gut on de Lehrder böhrden se heronder. Woll ehnen so kürasiert sin, dat hei selws afsprong ohne Hölp, mos hei en Stond norsetten, wegen die Gefahr van wegen de Knöök bräken. Met denn Titt kom en Schoolrot on sog ok die Tornerei. Denn Mann wor gerührt! Hei wor sogar erschüttert! Dann gow hei Pickart denn Root, sech jömmes tu holen, denn wat dorvon verstohn. Dat versprook Pickart ok.

De School gegenöwer wohnden Frankes, on bej Frankes hadden sej en Schnidder in de Koß. Schon wudden denn Tornlehrder. Hei sörgden dorvör, dat statt denn Balken en schöne glatte Stoolstang, die me ömpacken kos, ingesatt wudden. „Fenke Schmett“ besorgden die in beste Qualität. Die nächste Tornstond

wor en Ereignis! Nit alleen, dat die Blaagen gespannt woren, wat denn Schnidder öhr tu zeigen hat, sogar de Frau Pickart recheden dat so in, dat sej ok wat sog. Sej satt sech butten op de Bank on schellden Erpeln, wobej sej alles översiehn kos. Nor en Verlostond kohmen de Kinder op de Schoolhoff herütt. De Schnidder wor all dor on liet se ers nor de Grödde opstellen. Ers wudden twentig Minütten marschieret on dann geng et ant Reck. De Schnidder miek ers lechte Übungen vör. Dor menden die Pöös: „Wenn dat alles es, dat ös jor garnex! Dat können wej in ehnmol.“ Ok met de lechte Krom wudden de Blaagen ant End doch möhj. De Stond geng öm on do miek de Schnidder en Tugabe. Die Blaagen metsamt den Schoolmeister moßen en End turöch gohn. Dann rew de Schnidder sech de Hähn met wette Puder in on saag: „Jetz Achtung! Et kömp de Riesenschwung!“ On wie en Wendmöhl, wor ehne Flögel kapott es, so roßten denn flittscherige Schnidder öm de Reckstang. De Blaagen kreeten för Spaß, Pickart wor ganz Würde. Dat wor hei sinne Stand schöldig als Schoollehrder! Mar Frau Pickart wor ferdeg! Wie sej denn weldgewoddene Schnidder dör de Loff rotieren süht, fällt öhr denn Erpel, denn sej grad schellden, af on sej schreit: „Pickart, Pickart, lehr dat bloß de Kender nitt! O Gott, wenn dor wat passiert.“ Sej hiel de Schörz för et Gesech on hüllden. Jo, sej hat en week Gemüt.

Nor en halw Jahr hat denn Schnidder all en paar döchtige Torners tössen de Pöös, die de Tornerei övernehmen deien. Sej hadden de Schnidder all övertroffen! Hei wor nit mehr nödig. Dat jonge Volk holp sech selws. Ok denn Riesenschwung wud hier on dor gemak, äwer so, dat Frau Pickart et nit sog. Bej et nächste Mol, wie de Schoolroot kom, kreg Pickart en Lob för die döchtige Blaagen. Ömmer ös Turnen van denn Titt ahn in Olderoj Tradition gewäß. Mar wenn denk noch dorahn, dat denn Schnidder, denn bej Frankes en de Koß wor, et Tornen in Olderoj oprach. Van Daag hew ek an öm gedach. Grad van Daag vör dertig Jahr ös hei gestorwen, as olden hochbetagden Kerl. Ek bön stolz op öm! Et wor minne Vater!